



Opština Tutin



Bošnjačko nacionalno vijeće



SPORAZUM O SARADNJI



Tutin, 24. juli 2018. godine



Opština Tutin



Bošnjačko nacionalno vijeće

Polazeći od Ustavom Republike Srbije zajamčenih prava pripadnika nacionalnih manjina, odredbi Okvirne konvencije o zaštiti nacionalnih manjina, Evropske povelje o regionalnim ili manjinskim jezicima, Zakona o zaštiti prava i sloboda nacionalnih manjina, Zakona o nacionalnim savjetima nacionalnih manjina, Zakona o lokalnoj samoupravi i drugih domaćih i međunarodnih dokumenata o zaštiti ljudskih i manjinskih prava,

Opredijeljeni da udruženim naporima rade na rješavanju bitnih pitanja vezanih za poboljšanje položaja i ostvarivanja individualnih i kolektivnih prava Bošnjaka u općini Tutin,

Smatrajući da zajedničkim djelovanjem i akcijom mogu doprinijeti efikasnijem i djelotvornijem ostvarenju prava i sloboda Bošnjaka u Republici Srbiji,

Riješeni da unapređuju i međusobno obogaćuju buduću saradnju i partnerske odnose, a u cilju daljeg napretka u procesu pridruživanja Republike Srbije Evropskoj uniji,

Postupajući u skladu sa članom 20. st. 1. tačka 32 Zakona o lokalnoj samoupravi ("Sl. glasnik RS", br. 129/2007, 83/2014 - dr. zakon, 101/2016 - dr. zakon i 47/2018), članom 16. st. 1. tačka 34. Statuta općine Tutin („Opštinski službeni glasnik“, 5/2015), članom 10. st. 1. tačka 9, 10, 11, 14. i članom 26. Zakona o nacionalnim savjetima nacionalnih manjina ("Sl. glasnik RS", br. 72/2009, 20/2014 - odluka US, 55/2014 i 47/2018), članom 4. st. 1. Zakona o zaštiti prava i sloboda nacionalnih manjina ("Sl. list SRJ", br. 11/2002, "Sl. list SCG", br. 1/2003 - Ustavna povelja i "Sl. glasnik RS", br. 72/2009 - dr. zakon, 97/2013 - odluka US i 47/2018) i članom 14. st. 1. tačka 12, 13, 14 i 17. Statuta Bošnjačkog nacionalnog vijeća (broj: 1071-09/2017 od 21.12.2017. godine.)

OPĆINA TUTIN, koju zastupa predsjednik općine Kenan Hot,

i

BOŠNJAČKO NACIONALNO VIJEĆE, koga zastupa predsjednik Vijeća dr. Sulejman Ugljanin,

ZAKLJUČUJU

SPORAZUM O SARADNJI



Član 1.

Cilj potpisivanja Sporazuma je uspostavljanje saradnje u procesu implementacije Ustavom, zakonom i međunarodnim dokumentima zagwarantovanih prava i sloboda Bošnjaka, očuvanja bošnjačkog nacionalnog identiteta, poboljšanja sveukupnoga položaja Bošnjaka, punog ostvarivanja manjinske samouprave i prava koje iz nje proističu, u Republici Srbiji i na području općine Tutin.

Član 2.

Potpisnici će razvijati međusobnu saradnju u oblastima od značaja za Bošnjake i potpisnike Sporazuma poštujući nadležnosti i prava kojima raspolažu i koja imaju, u skladu sa odredbama Zakona o zaštiti prava i sloboda nacionalnih manjina, Zakona o nacionalnim savjetima nacionalnih manjina, Zakona o lokalnoj samoupravi i drugim zakonima koji se bave pravima i položajem manjinskih nacionalnih zajednica.

Član 3.

U interesu efikasnijeg i djelotvornijeg ispunjenja cilja definisanog u članu 1. ovog Sporazuma potpisnici će upotrijebiti sve zakonske mehanizme za zaštitu i potpuno ostvarenje prava Bošnjaka na:

- a. obrazovanje i vaspitanje na maternjem bosanskom jeziku u institucijama predškolskog, osnovnog i srednjeg obrazovanja i vaspitanja;
- b. očuvanje, zaštitu i unaprijeđenje kulturnih vrijednosti i materijalnog i nematerijalnog naslijeđa;
- c. službenu i javnu upotrebu bosanskog jezika i pisma;
- d. obaveštavanje i informisanje na bosanskom jeziku, uključujući pravo na izražavanje, primanje, slanje i razmjenu informacija;
- e. izražavanje, čuvanje, njegovanje, razvijanje, prenošenje i javno ispoljavanje nacionalne i etničke, kulturne, vjerske i jezičke posebnosti;
- f. slobodan izbor i upotrebu nacionalnih simbola i znamenja;
- g. ravnopravnost u vođenju javnih poslova i stupanju na javne funkcije;
- h. adekvatnu zastupljenost u državnim organima, ustanovama, javnim preduzećima, organizacijama i službama sa javnim ovlaštenjima u skladu sa nacionalnom strukturom stanovništva;
- i. Život, slobodu i bezbjednost;
- j. zaštitu od diskriminacije po osnovu nacionalne i vjerske pripadnosti;
- k. zaštitu od svih oblika asimilacije;
- l. poboljšanje socio-ekonomskog položaja;
- m. obezbjeđenje ravnopravnosti u drugim oblastima, u skladu sa zakonom.

Član 4.

Organi lokalne samouprave općine Tutin neće donositi pravne akte, niti preduzimati bilo kakve aktivnosti, radnje i mjere kojima bi se moglo dovesti u pitanje ili onemogućiti ostvarenje Ustavom, zakonom i međunarodnim dokumentima garantovanih prava i sloboda Bošnjaka, navedenih u članu 3. ovog Sporazuma.



Član 5.

Općina Tutin se obavezuje da:

- a.** imenuje predstavnike Bošnjačkog nacionalnog vijeća u sva stalna i povremena radna tijela Skupštine općine Tutin, u roku od 30 dana od dana potpisivanja ovog Sporazuma;
- b.** u razumnom roku, a najkasnije do 31. decembra 2018. godine, obrazuje odgovarajuće radno tijelo Skupštine općine, koje bi se bavilo praćenjem ostvarivanja prava i sloboda Bošnjaka na teritoriji općine Tutin, garantovanih Ustavom, općeprihvaćenim pravilima međunarodnog prava, potvrđenim međunarodnim ugovorima i zakonima;
- c.** u razumnom roku, obrazuje Savjet za međunacionalne odnose;
- d.** Skupština općine najmanje jednom godišnje razmatra i usvaja izvještaj o položaju i ostvarivanju prava i sloboda Bošnjaka na teritoriji općine Tutin, na prijedlog Općinskog vijeća, uz prethodno pribavljeno pozitivno mišljenje Bošnjačkog nacionalnog vijeća;
- e.** u skladu sa svojim mogućnostima, a u saradnji sa Bošnjačkim nacionalnim vijećem, obezbijedi besplatne udžbenike za učenike koji pohađaju nastavu na bosanskom jeziku;
- f.** u skladu sa svojim mogućnostima, a u saradnji sa Bošnjačkim nacionalnim vijećem, obezbijedi potrebne lektire za nastavu na bosanskom jeziku u osnovnim i srednjim školama;
- g.** poštuje sve Ustavom i zakonom propisane nadležnosti Bošnjačkog nacionalnog vijeća;
- h.** budžetom predvidi adekvatna sredstva za sufinansiranje redovnog rada Bošnjačkog nacionalnog vijeća te da ista redovno isplaćuje;
- i.** u skladu sa svojim finansijskim, administrativnim i tehničkim mogućnostima i kapacitetima podrži manifestacije i projekte Bošnjačkog nacionalnog vijeća;
- j.** preko predstavnika lokalne samouprave u organima upravljanja u ustanovama predškolskog, osnovnog i srednjeg obrazovanja i vaspitanja omogući prisustvo predstavnicima Vijeća prilikom upisa djece i učenika u predškolske ustanove, osnovne i srednje škole, odnosno prilikom anketiranja roditelja i učenika o modelu i jeziku na kome će se izvoditi nastava;
- k.** izabere ili imenuje jednog člana Općinskog vijeća ili pomoćnika predsjednika općine nadležnog za praćenje ostvarivanja prava i sloboda Bošnjaka na teritoriji općine Tutin;



Član 6.

Bošnjačko nacionalno vijeće se obavezuje da:

- a. omogućiti učešće u radu po jednom predstavniku općine Tutin u odborima Bošnjačkog nacionalnog vijeća za obrazovanje, informisanje, kulturu, službenu upotrebu bosanskog jezika i pisma i nadzora i kontrole ostvarivanja prava Bošnjaka;
- b. omogućiti predstavniku određenom od strane općine Tutin ostvarivanje prava na prisustvovanje sjednicama Vijeća i radnih tijela Vijeća sa pravom učešća u radu bez prava glasa, kao i pravo predlaganja tačaka dnevnog reda, programa i projekata iz oblasti obrazovanja, kulture, informisanja i službene upotrebe jezika i pisma kao i drugih oblasti od značaja za Bošnjake;

Član 7.

Sporazum se zaključuje na neodređeno vrijeme.

Svaki od potpisnika može da otkáže ovaj Sporazum, pisanim obavještenjem i obrazloženjem uz otkazni rok od tri mjeseca.

Bez obzira na prestanak važenja ovog Sporazuma, njegove odredbe primjenjuju se na projekte i ugovore koji su u toku, do njihovog završetka osim ako potpisnici ne ugovore drugačije.

Izmjene i dopune ovog Sporazuma vrše se dogovorno između potpisnika.

Sporna pitanja vezana za tumačenje i realizaciju ovog Sporazuma, biće rješavana dogovorno.

Član 8.

Ovaj Sporazum sačinjen je u četiri (4) istovjetna primjerka od kojih po dva (2) pripadaju potpisnicima.

Član 9.

Sporazum stupa na snagu danom potvrđivanja od strane nadležnih organa potpisnika.

Tutinu, 24. juli 2018. godine

Za Općinu Tutin

Za Bošnjačko nacionalno vijeće

Kenan Hot,
Predsjednik

Dr. Sulejman Ugljanin
Predsjednik

